

1 Pedro

1 Høöch xøhajt Pedro. Jesucristøch xquiuguexyhajp. Mijts hädaa nocy nyajnäjaayøøby pønhatiä Diosmädia'agy mäbøjp. Xii yaa hajxy wiingtuumjaty mhadsäna'ay jim maa naax jaduhñ xiøhatiän Ponto, møød jim Galacia, møød jim Capadocia, møød jim Asia, møød jim Bitinia. ²Jequiän mijtsä Diosteedy xwyiimbiyy. Tøø Dios hänajty ñajuø'oy coo mijtsä miädia'agy hänajty mmäbögaanä. Ja'a yhEspirituhaama Dios hajxy tøø xyaghodiägø'oy, weenä mädia'agy hajxy jaduhñ mmäböögät ja'a Jesucristocøxpä. Jaaya'ay hajxy tøø xyajnähwáatsäm mänaa hajxy xñähho'túutäm. Weenä Dios ja'a hoyhajtä weenhajt hajxy xmio'oy mõj may.

³Tsögä Dios hajxy wiingudsähgøøyyäm. Jaaya'ayä Jesucristo Tieedyhajpy. Højtsä Jesucristo nWiindsønhtëm. Højiootä Dios jiaanç tehñ miøød ja'a højtsøxphhtëm, paady hajxy homiänaajä xyagjugyhadaänäm neby je'e jiugyhatiän. Coø Dios ja'a Jesucristo yagjujypiøjtägajch coø hänajty tøø yho'ogy, jaduhñä tøyhajt hajxy nmøødhhtëm coø Dios hajxy jaduhñ xjiaanç

yagjugyhadaänäm homiänaajä ⁴jim tsajpootyp. Jimä hoyhajtä weenhajt hajxy mõj may xmio'owáanäm, neby jaduhñ jecy miänaañän cooc hajxy hänajty xmio'owáanäm. Tijaty hajxy yaa nyagjugyhhtëm hädaa yaabä naaxwiin, tsipcøxp jaduhñ quiøxa'añ, tsipcøxp jaduhñ quiuhdägoyya'añ. Pero mädyijjatiä Dios hajxy jim xmio'owáanäm tsajpootyp, cab jaduhñ mänaa quiøxa'añ, cab jaduhñ mänaa mia'ada'añ, cab jaduhñ mänaa quiuhdägoyya'añ. Homiänaajä yajxøn yhida'añ. ⁵Coo mijtsä Dios miädia'agy jaduhñ mmäböjcä, paadiä Dios hajxy xcwieendähada'añ ja'a miøcmäjaahaam. Cab hajxy jaduhñ mänaa mguhdägoyya'añ. Coø ja'a Dios yHuung yaa quiädaactägatsa'añ hädaa yaabä naaxwiin, ja'a Jesucristohajpä, mänit hajxy jim xyajnöcxáanäm tsajpootyp Dioswiinduum. Jimä Dios hajxy homiänaajä xyagjugyhadaänäm neby je'e jiugyhatiän.

⁶Paady mijts jootcuyc mhity, hoy hajxy jäda'ahaty madiu'u mja tsaächpøcy. Pero cab hajxy jecy mdsaaçhpøga'añ. ⁷Høxtahmðsä

oro, jøønhaamä jäya'ayä oro hajxy yhiixmach pø hoyhoro jaduhñ. Jaanä jaduhñ mijtsä Dios xyhiixmajtspä pø hamuumdu'jootä miädia'agy hajxy mmäbøjcä, hoy hajxy mja jaančh tehñ chaačhpøcy. Jaančh tehñ choobaatp jaduhñ coo hajxy jaduhñ mmäbøgät tehñgajnä. Cabä oro jaduhñ jiaty tsoobaady neby jaduhñ choobaadiän nej mijts homiänaajä mmäbøquiän. Hix, tsipcøxpä oro jaduhñ quiuhdägoyya'añ. Y coo Jesucristo yaa quiädaactägatsa'añ, mänit mijts xquiumaya'añ je'eguiøxpä coo hajxy hänajty tøø mmäbøcy, hoy hajxy hänajty tøø mja jaančh tehñ chaačhpøcy.

⁸⁻⁹Hoyyä Jesucristo hajxy tøø mga'a jagä hixy, mdsojpy mba'häyooby hajxy jaduhñ, y mmäbøjcäbä miädia'agy hajxy jaduhñ. Hoy hajxy tøø mga'a jagä hixy, coo hajxy jaduhñ mmäbøcy, paady hajxy jaduhñ tøø xyajnähwa'aäch. Coo hajxy jaduhñ tøø xyajnähwa'aäch, paady hajxy jaduhñ mjaančh tehñ xioonda'agy nägø'ø nädecypä.

¹⁰Ja'a jäya'ayä Diosmädia'agy hajxy jecy jajwá'xäbä, jia wi'i yajtøøby jia wi'i yajtø'xyp hajxy hänajty neby hajxy piäda'agøøjät hawa'adstuum. Cab hajxy hänajty ñajuø'øby neby hajxy jaduhñ jim piäda'agøøjät. Pero ñägapx hajxy jaduhñ coo mijtsä Dios hänajty xpiäda'aga'añ hawa'adstuum, je'eguiøxpä coo hojioot miøødä.

¹¹Yajtøøby hajxy hänajty pøn mijts hänajty min xpiäda'aga'añ hawa'adstuum. Jaduhñ hajxy hänajty yajtøøbä mänaa hänajty

myina'añ. Ja'a Dios jaduhñ hawaanä ja'a yhEspírituhaam cooc tu'jäya'ay hänajty yaa min chaačhpøga'añ. Y cooc hänajty tøø yho'nä, mänítäc hänajty jiuypjøjtägatsa'añ. Mänítäc hänajty jim ñøcxtägatsa'añ tsajpootyp maa Dioswiinduumän. Pero ja'a jecyjiäya'ayhajxy, cab hajxy hänajty jaduhñ ñajuø'øby pønä Dios hänajty tøø ñänømy ja'a yhEspírituhaam. Nä'a cujahy hajxy jaduhñ nebiaty hajxy jaduhñ ñajtsapxøøyyä.

¹²Mänit hajxy jecy yhawáanäxä coogä Dios jaaya'ay hänajty quia'a tsoj quexa'añ, ja'a mijts hänajty xpiäda'agaambä hawa'adstuum. Cujéquiägä Dios hänajty quixa'añ. Hoorä, tøø quiejxnä. Jaduhñ tøø yajtøjajinä coo ja'a yajnähwaatspä tøø quiejxnä. Y tøø mijts jaduhñ mjaančh mädoxyaty coo ja'a yajnähwaatspä yaa tøø yhoy. Ja'a Jesucristøch jaduhñ nnänøømby coo hajxy hoy xñähho'túutäm. Y jaaya'ay mijts xyajmädoxyhajtäbä, ja'a Dios ja'a yhEspírituhaam hajxy jaduhñ ñajtsapxøøyyä nebiatiä Diosmädia'agy hajxy jajwá'xät. Tsajpootypä Dios ja'a yhEspíritu yajtsohñdaacy coo jaduhñ yaa quiejxy hädaa yaabä naaxwiin. Haa ja'a Dios ja'a mioonsähajxiä, ja'a hajxy jaduhñ jim hijpä tsajpootypä, jiaančh tehñ yagjuøøby hajxy jaduhñ coo Dios ja'a yHuung jaduhñ yaa quiejxy hädaa yaabä naaxwiin, coo højts hoy xñähho'túutäm.

¹³Y coo Jesucristo jaduhñ yaa jadähooc quiädaactägatsa'añ, mänit hajxy jaduhñ jim xyajñøcxáanäm tsajpootyp maa Dioswiinduumän, pønjetiä Diosmädia'agy hänajty

tøø miäbøcy. Mänitä hoyhajtä weenhajtä hajxy jim ca'xy xmio'owáanäm. Coo Dios jaduhñ tøø miäna'añ coogä yHuung yaa quiädaactägatsa'añ, jaduhñä tøyhajt hajxy nmøødhajtäm coo jaduhñ tiøjiada'añ. Tsøcxä njoot hajxy pädaacäm maa hoyhajtän, maa weenhajtän, mädyii Dios hajxy hänajty xmio'owáanäm. Tsøcxä hajxy hoy wädíjtäm. Tsøc hajxy jahmiejtstäacäm coo Jesucristo yaa quiädaactägatsa'añ. ¹⁴Coo Dios hajxy xyhuunghajtäm, paadiä miädia'agy hajxy tsøc mäbøjcäm. Cabä haxøøgwiinmahñdy hajxy jadähooc mbadu'ubøjcumbät, neby hajxy hijty mjatcø'øyän coo Dioscapxiä Diosmädia'agy hajxy hijty mga'a mädoxyatyñä. ¹⁵Ca'a haxøøgjoot ca'a haxøøgwiinmahñdy hajxy myaghity. Hix, cabä Dios haxøøgjoot haxøøgwiinmahñdy ñä'ägädä møødä. Jaaya'ay hajxy jaduhñ xyajñähdíjjäm coo hajxy xquiu'ughadäanäm. Paadiä hojioot hajxy tsøc yaghíjtäm nebiä Dios hojioot miøødän. ¹⁶Jaduhñ jim myiñ cujaay maa Diosmädia'aguian: "Høøch, cábøchä haxøøgjoot cábøchä haxøøgwiinmahñdy nnä'ägädä møødä. Høøch hajxy pahix paduünäc", nømä Dios jecy miänaañ.

¹⁷Ja'a Dios hajxy nwiingudsähgøøyyäm. NDeedyhajtäm hajxy jaduhñ. Paady hajxy hoy tsøc jäya'ayhajtäm mäduhñtiä hajxy yaa ndsänaayy nhäyóowäm hädaa yaabä naaxwiin. Hix, nnajuøøyyäm hajxy jaduhñ coo Dios hajxy xyajcumädoxwáanäm nebiaty hajxy hänajty yaa haxøøg

tøø njatcøøyyäm hädaa yaabä naaxwiin, hoy hajxy hänajty näje'e tøø nja mäyøødsänáayyäm. ¹⁸⁻¹⁹Ja'a nhaphajtäm ja'a ndeedyhajtämhajxy ja'a jegyhajtypä, coo yhamdsoo cuhdujt hajxy hijty hoy quiudiuñ, jadúhñäc tyijy hajxy ñähwa'adsa'añ. Y jaduhñ mijts tøø mbahabøjpä. Pero cab jaduhmbä cuhdujt choobaady. Coo Jesucristo hajxy hoy xñähho'túutäm, ja'a ñø'tyhaam hajxy xpiädäacäm hawa'adstuum. Ni tii hajxy jaduhñ xquia'a pädaacäm hawa'adstuum, ni xädø'øñ. Hix, paquiä xädø'øñ quiøxy. Jagooyyä Jesucristo hajxy xpiädäacäm hawa'adstuum ja'a ñø'tyhaam. Hix, cabä Jesucristo ni tii poj ni tii cädieey quia'a møødä. Paady hajxy je'e hoy xpiädäacäm hawa'adstuum. Coo Jesucristo ja'a poj ja'a cädieey häxøpy miøødhaty, cab hajxy häxøpy tøø xpiädäacäm hawa'adstuum. ²⁰Jéquiänä Dios ja'a yHuung jaduhñ yajñähdijy cooc hänajty yaa quixa'añ hädaa yaabä naaxwiin, cáhnäc hädaa naaxwiimbä hänajty yhawijy tiøø'xta'agy. Pero cabä Dios ja'a yHuung choj quejxy. Cujecy jaduhñ quiejxy mänaabä højts hänajty yaa njugyhajtämbä. Højts hoy xñähho'túutäm. ²¹Coo Jesucristo hänajty tøø yho'ogy, mänitä Dios yagjujyipiøjtägajch. Mänit jim jadähooc yajnøcxy maa wyiinduumän. Jim jäda'ahaty wyiingudsähgø'øyii. Y coo Dios ja'a yHuung jaduhñ yagjujyipiøjtägajch, paadiä miädia'agy hajxy tsøc mäbøjcäm coog hajxy xyagjugyhadaänämbä homiänaajä neby je'e jjugyhatiän.

²²Tøyyä Dios miädia'agy. Y coo mijsä miädia'agy hoy mgudiuunä, paadiä mjootä mjuøhñdyhajxy nähwa'ads yhity. Naxy hajxy jaduhñ mdehmñ ñiçhoc mdehmñ ñimiee'xøøjät hamuumdu'joot. Jaduhñ hajxy mnijäwø'øwøøjät nebiä tu'que'expän nebiä tu'mägu'ugpäñ. ²³Tøø haxøøgjoot tøø haxøøgwiinmahñdy hajxy nnajtshixøøyyäm. Homiänaajä Dios hajxy xyagjugyhadäänäm neby je'e jiuğyhatiän. Jaduhñä hojiootä howyiinmahñdy hajxy xmióoyyäm hawiinjemy, je'leguiøxpä coo miädia'agy hajxy nmäbøjcäm. Cabä miädia'agy mänaa quiuhdägoyya'añ. Jaaya'ay hajxy jaduhñ xyagjugyhadäänäm homiänaajä neby je'e jiuğyhatiän, ca'a piønä hädaa yaabä naaxwiimbä, ni ja'a ndajhajtäm ni ja'a ndeedyhajtäm. Haa ja'a hädaa yaabä naaxwiimbä jugyhajtä, tsipcøxp jaduhñ quiøxa'añ.

²⁴Jaduhñ jim myiñ cujaay maa Diosmädia'aguian:

Høxtahñdsä øøjy, hoy jaduhñ jia yajxonä, tsipcøxp je'e ñä'ägä tø'øch.

Jaduhñ mäwiin højtshajtäm, hoy hajxy mõj jaanç nja nijäwøøyyäm, tsipcøxp hajxy nnä'ägä ho'og nnä'ägä tägoyyaänäm.

²⁵Pero ja'a Diosmädia'agy, cab jaduhñ mänaa quiøxy tiägoy. Ja'a Diosmädia'agy jaduhñ mänaamb coogä Jesucristo hajxy hoy xñähho'túutäm. Tøø mijsä jäya'ay jaduhñ xyajmädoğyhaty, ja'a Diosmädia'agy hajxy jecy yajwá'xäbä.

2 Coo Dios hajxy homiänaajä xyagjugyhadäänäm neby

je'e jiuğyhatiän, jaduhñä hojiootä howyiinmahñdy hajxy tøø xmióoyyäm hawiinjemy. Paadiä haxøøgjootä haxøøgwiinmahñdy hajxy tsøc najtshixøøyyäm cøxiä. Cab hajxy mnä'ägä høhñdä'agät ni weeñtiä. Hamuumdu'joot hajxy jaduhñ tøy mjaanç hojiäya'ayhädät. Jii jäya'ayhajxy näje'e, cabä Diosmädia'agy hajxy hoy quiudiuñ, hoy hajxy jia nidijyii nebiä hojiäya'ayän. Ca'a hajxy jaduhñ mbahixy. Ca'a hajxy pøn cøxiä wiinä myajcuxøøghadøøy. Cab hajxy mniñähøøn mniñähøøjät. ²⁻³Tøyhajt jaduhñ coo Jesucristo mayhajt mõj may tøø tiuñ maa mijsæøxpän. Mnajuøøby hajxy jaduhñ, túhmäts. Hahixøøbyxiä jaduhñ coo miädia'agy hajxy tehngajnä mbanøcxät. Høxtahñdsä maaxhuunghajxy, coo hajxy hänajty chi'lidsa'añ, mänitä tsi'tsc hajxy ñäjøøy. Jaduhñ mäwiin mijspä, mba'yá'axäp ja'a Dios hajxy coo quiapxiä miädia'agy hajxy ween tehngajnä xjiaac yaghabøcy. Jaduhñ hajxy ca'xy pedyii hoy myajtúnät. Y cab hajxy jaduhñ mänaa mdu'udägóyyät.

⁴Tehngajnä Jesucristo wyiinmahñdy hajxy jaac tehñ piahijxä jaac tehñ piaduunä. Ja'a Dios jaduhñ jecy wiinmaayy coo højts hänajty jaduhñ xyhuunghadäänäm ja'a Jesucristocøxpä. Ja'a Jesucristo, ja'a Dios yHuung je'e, paadiä cuhdujt jaduhñ miøødä coo hajxy nwiingudsähgøøyyämät. Pero cabä jäya'ayä Jesucristo hajxy näje'e jiojpoğøøy. Cab hajxy wyiingudsähgøøy. Xiøøghajpy

hajxy jaduhñ. ⁵⁻⁶Jaduhñ
jim myiimbä cujaay maa
Diosmädia'aguiän:

Jim maa cajpt jaduhñ xiøhatiän
Siön, jimhøchä ndsajtøjc tu'ug
ngojy.

Tú'ughøchä tsaä nwiimbiiyy
coo jim piäda'agøøjät maa
tøjteecän.

Jaanč tehñ tiuungpaatp yø'ø
tsaa jaduhñ.

Ja'a Dios ja'a Jesucristo jaduhñ
yajmäbaat nebiä tsaä ja'a jaanč
tehñ tiuungpaatpän, coo jaduhñ
yaa quiejxy hädaa yaabä naaxwiin,
coo hajxy hoy xyajñhwáatsäm.
Jaduhñä Dios miänángumbä
cooc tsipcøxp yajtøjiada'añ coo
hajxy jim yajnøcxa'añii tsajpootyp
maa Dioswiinduumän, pønjaty
jaduhñ mäbøjp coo Jesucristo
hajxy xyajñhwáatsäm, ca'a
wyiinghäna'cä. Coo Jesucristo
hajxy tøø xjiaanč yajñhwáatsäm,
jaduhñä Dios hajxy tøø
xyajñhdíjjäm coo Jesucristo hajxy
nmøødhíjtämät tu'ugmädia'agy.
Tehngajnä Diosmädia'agy hajxy
tsøc hoy jaac tehñ quiudiúñäm.
Tsøgä Dios hajxy hoy jaac tehñ
wyiingudsähgøøyyäm. Jaduhñä
Dios hajxy xquiumáayyämät.

⁷Coo mijts jaduhñ mmäbøcy
coo Jesucristo hajxy hoy
xyajñhwáatsäm, paadiä Jesucristo
hajxy mdsocy, paady hajxy
mwiingudsähgø'øy. Hoorä, jaduhñ
jim myíingumbä cujaay maa
Diosmädia'aguiän:

Jii tsaä tu'ug, cabä
tøjmuu'tspädøjc-hajxy hijty
hoy yhixy;
cab hajxy hijty yajtuna'añ.

Pero ja'a cudøjc, yajxón
yø'ø tsaä yhixy, paady jim
yajpädaacä maa tøjteecän.

⁸Jaduhñ wiingtuum myíingumbä:
Jii tsaä tu'ug, coo pøn
quiuhnepy, cädaab hajxy
jaduhñ.

Ja'a Jesucristo jaduhñ yajmäbaatä
neby yø'ø tsaajän.

⁹Højtsä Dios tøø xyajñhdíjjäm
coo miädia'agy hajxy nmäbøjcämät,
coo hajxy xquiu'ughájtämät.
Xyhuunghájtäm hajxy jaduhñ coo
hajxy ween hoy njäya'ayhájtämät
neby je'e hoy jjäya'ayhatiän. Tøø
cuhdujt hajxy xmióoyyäm coo
hajxy nDeedyhájtämät nebiä
Jesucristo ja'a Dios Tieedyhatiän.
Tøø Dios hajxy xyajpädsøømäm
haxøøgtuum. Hodium hajxy
hoy xpiädaactägájtsäm. Jaduhñä
miädia'agy hajxy nyajwá'xämät
coo mõjmayhajt tøø tiuñ maa
højtsøxphájtäm. ¹⁰Coo mijts hijty
mga'a mäbøcy, paadiä Dios hajxy
hijty xquia'a cu'ughaty. Cabä Dios
hajxy hijty xñäxuuč. Pero coo
hajxy jaduhñ mmäbøjnä, paadiä
Dios hajxy jaduhñ xñäxuu'tsnä.
Paady hajxy xquiu'ughajnä.

¹¹Mägu'ughajpädøjc, hoy hajxy
yaa nja híjtäm hädaa yaabä
naaxwiin, cabä njoot hajxy yaa
tøø nbädáacäm maa hädaa yaabä
naaxwiimbän. Jimä njoot hajxy tøø
nbädáacäm maa Dioswiinduumän.
Tsøcxä haxøøgwiiinmahñdy
hajxy høxhíjxäm, jaduhñä
Dios miädia'agy hajxy hoy
ngudiúñämät. ¹²Hoy hajxy mja
hity maa jäya'ayä Diosmädia'agy
hajxy quia'a mäbøquiän, hoy
hajxy mwädítät. Hoy hajxy jaduhñ

mjäya'ayhádát, hoyyá jáya'ay hajxy cu xjia nähøønø'ow. Coo Dios yaa quiiádá'agát tøyhajtyajeyjpä, mänit mijtsä jáya'ay hánajty xyhixa'añ coo mijtsä Dios miädia'agy hánajty hoy tøø mjaančh cudiiuunä, ja'a Diosmädia'agy hajxy hánajty tøø quia'a mábóquiäbä. Mänitä Dios hajxy wyiingudsähgø'owa'añ.

¹³Mwiingudsähgøøyyäbä tuungmøødpä miädia'agy hajxy. Cabä pøn jaduhñ waamb xñänómät. Hix, mbanøcxypä Diosmädia'agy hajxy jaduhñ. Y coo ja'a tuungmøødpä miädia'agy hajxy mga'a wiingudsähgøøyyät, mäna'anaambä jáya'ayhajxy jaduhñ coogä mädia'agy quia'a hoyyá, ja'a mijts jaduhñ mbanøcxypä. Mwiingudsähgøøyyäbä gobiernä miädia'agy hajxypä. Jaaya'ay møjtuung jaduhñ nä'ägä møød. ¹⁴Mwiingudsähgøøyyäbä gobiernä mioonsä miädia'agy hajxypä, ja'a hajxy jaduhñ møjtuungmøødpä. Pønjaty jaduhñ cädiehy, je'e hajxy jaduhñ yajcumädooby. Pønjaty hoy jáya'ayhajp, je'e hajxy jaduhñ quiumaaby. ¹⁵Jaduhñä Dios chocy coo hajxy hoy mjäya'ayhádát. Jii jáya'ayhajxy näje'e, cabä Diosmädia'agy hajxy ñäl'ägädä wiinjuø'owa'añ. Jaančh tehñ quiihxex hajxy jaduhñ. Hoy hajxy jaduhñ quia'a jagä wiinjuø'owa'añ, nøm hajxy wyi'i miäna'añ cooc tyijy ja'a Diosmädia'agy quia'a hoyyá. Hoorä, coo mijts tøyhajt mhöjjiaya'ayhádát, caj mijtsä jáya'ay hoy xñähøønø'owät, ja'a Diosmädia'agy hajxy ca'a wiinjuø'owaambä.

¹⁶Näje'ejä jáya'ayhajxy miäna'añ cooc tyijy cuhdujt hajxy miøødä

coo hajxy hoñejpiä jiatcø'owät, je'eguiøxpä coogä Jesucristo hajxy tøø yajnähwa'ačhii. Pero cab jaduhñ tiøyyä. Cab jaduhñ yhooyä coo hoñejpiä njatcøøyyämät. Pero tsögä Dios miädia'agy hajxy cudiiuunäm nebiaty hajxy xyhanéhäm.

¹⁷Mwiingudsähgø'owäbä jáya'ay hajxy nägøxiä. Mničhoc mnimiee'xøøjap hajxy pønjatiiä Diosmädia'agy mábøjp. Mwiingudsähgø'owäbä Dios hajxy, jaduhñä gobiernä hajxy mwiingudsähgøøbiät.

¹⁸Mijtshajxy moonsähajpä, mmábøjcäbä mwiindsønä miädia'agy hajxy. Mwiingudsähgø'owäp hajxy jaduhñ, hoy hánajty yhojiiaya'ayä quia'a hojiiaya'ayä. ¹⁹Coo mwiindsøn hajxy xchaačhtiúnät nä'ä nägoobä, hoy hajxy hánajty tøø mga'a jagä cädieey, mmee'xtügäp hajxy jaduhñ. Mnajuøøby hajxy jaduhñ coo Dios hajxy jaduhñ xquiumáyät. ²⁰Pero pø tøø hajxy hánajty mjaančh cädieey, hahixøøby jaduhñ coo hajxy mgumädowät. Y cabä Dios hajxy jaduhñ xquiumáyät, hoy hajxy cu mja mee'xtuc. Pero pø cab hajxy hánajty tøø mgädieey, coo mwiindsøn hajxy nä'ä nägoobä xyajcumädowät, y coo jaduhñ mmee'xtügät, mänitä Dios hajxy jaduhñ xquiumáyät. ²¹Jaduhñä Dios hajxy tøø xyajnähdíjjäm coo häna'c hajxy nä'ä nägoobä xchaačhtiunämät nebiä Jesucristo chaačhtiuunän. Hix, højts jaaya'ay xñähho'túutäm. Y miee'xtujc jaduhñ. Jaduhñä Dios chocy coo Jesucristo hajxy nbahíjxämät neby je'e miee'xtujquiän. ²²Cabä

Jesucristo mänaa nã'ägä cädieey.
 Ni mänaa quia'a hõhnda'agy.
²³ Coo haxøøg jia nãmaayä,
 cab haxøøg yhadsoodägajch.
 Coo chaächtiuunä, cab jaduhñ
 waamb miänaañ coo hãnajty
 yaghawiimbijtagatsa'añ. Ja'a Dios
 quiø'øjooty je'e ñibiädaacä. Hix,
 ñajuøøbiä Jesucristo hãnajty jaduhñ
 coo jäya'ayhajty hãnajty nägøxiä
 yajtøyhajtyega'añii ja'a Diósäm.
 Jaduhñä Dios hajxy xyhíjxäm
 neby hajxy njäya'ayhãjtäm. ²⁴ Coo
 Jesucristo hajxy hoy xñähho'túutäm
 cruzcøxp, jaduhñä nbojpä ngädieey
 hajxy xyajnähwáatsäm. Tsøcxä
 ja'a haxøøgwiinmahñdy hajxy
 najtshixøøyyäm. Tsøc hajxy
 jahmiejtstáacäm coo Jesucristo
 hajxy nmøødhíjtäm tu'ugmädia'agy
 mänaa yho'oguiän, mänaa
 jiuypjøjtägachän. Paady hajxy
 njugyhadáañäm homiänaajä
 nebiä Dios jiu gyhatiän. Coo hajxy
 jaduhñ ngudiúunämät nebiä Dios
 hajxy xyhanéhämäm, mänitä Dios
 hajxy jaduhñ xquiumayáañäm.
²⁵ Jaduhñ mäwiin hajxy hijty
 njäya'ayhãjtäm nebiä meeghajxy
 tiägowiäditiän jäguemduum. Cabä
 mädia'agy hajxy hijty nmäbøjçäm
 ja'a Jesucristocøxpä. Pero tøø hajxy
 nmäbøjçänä. Y xcwieendähãjtämä
 Jesucristo hajxy jaduhñ.

3 ¹⁻² Mijts to'oxiøjtøjc,
 mwiingudsähgø'øwäbä
 mnihyhap hajxy. Coo mnihyhapä
 miädia'agy hajxy hoy mgudiúunät,
 y coo Jesucristo hajxy
 mwiingudsähgø'øwät, wehñdä
 mnihyhapä Diosmädia'agy hajxy
 miäbøgät, pø cahnä hajxy hãnajty
 miäböcyñä, hoy hajxy hãnajty

waamb mga'a jagä nãma'ay coo
 hajxy ween miäböcy. ³⁻⁴ Je'e
 ja'a Dios jaduhñ quiumaaby coo
 hojioot hajxy mmøødhädät, coo
 mnihyhap hajxy mee'xxieemy
 mmägápxät. Je'eds jaduhñ
 tsoobaatp coo Diosmädia'agy
 hajxy jaduhñ mgudiúunät
 hamuumdu'joot. Y cab hajxy
 jaduhñ mänaa mdu'udägóyyät. Cab
 hajxy myajcumáyät pø jii howyit
 hodiucxy hajxy hãnajty mmøødä,
 pø jii oronaamdsøm, pø jii
 orotaatstøy hajxy hãnajty mmøødä,
 pø hoyyä mguhwaay hajxy
 howyit hoguiuhxotshaam hãnajty
 mgu'udy. Cabä Dios yø'øduhmä
 jiaty møjpäda'agy, ni jaduhñ
 quia'a jega'añ. ⁵ Ja'a to'oxiøjçä
 Diosmädia'agy hajxy hijty jegyhajty
 panøcxpä, wyiingudsähgøøbiä
 ñihyhap hajxy hijty. Mee'xxieemy
 hajxy hijty. Miäbøjpiä
 Diosmädia'agy hajxy hijty coo
 hajxy hãnajty cwieendähada'añii
 ja'a Diósäm. ⁶ Jaduhñä Sara ja'a
 ñihyhap jecy wyiingudsähgøøyy,
 ja'a Abrahamhajpä. Mee'xxieemy
 hãnajty miägapxy. Quiumaayy
 ja'a Dios ja'a Sara jaduhñ. Y mijts
 to'oxiøjtøjc, jaduhñ mijtsä Dios
 xquiumáabiät coo mijtsä Sara
 wyiinmahñdy mbahijx mbadúunät.
 Hoy hajxy mwädítät ja'a Dioscøxpä.
 Y cabä mhaa mjoot hajxy myagjádät
 cooc tyijy ja'a mnihyhap hajxy
 hãnajty mmägapxtägoy.

⁷ Jaanä jaduhñ mijts nmägapx
 nhanehmä, mijts ya'adiøjtøjc.
 Mdsoc mmée'xäbä mdo'oxiøjç
 hajxy. Mmøødhädäbä hojioot
 hajxy jaduhñ. Hix, cabä to'oxiøjçä
 miäjaahajxy miäbaady nebiä

ya'adiøjc-hajxy miøcän. Paady hajxy mgüeendähädät. Hix, xmiøoby mijtsä Dios ja'a hoyhajtä weenhajt näguipxy møødä mdo'oxiøjc. Hix, näguipxiä Dios hajxy xyajnähwä'äch møødä mdo'oxiøjc-hajxy. Tiuumbiä Dios mayhajt jaduñ. Pero coo mdo'oxiøjc hajxy mga'a tsoc mga'a mée'xät, xiøøbä Dios hajxy jaduñ mnä'a pa'yáaxnät.

⁸Mägu'ughajpädøjc, jaduñ hajxy homiänaajä mnä'ägä niçhoc mnä'ägä nimiee'xøøjät nebiä tu'ugmägu'ug nebiä tu'ugpuhya'ayän. Mniñäxuudsøøjäp hajxy jaduñ hamiñ haxøpy. Mee'xxieemy hajxy mnimiøødcapx mnimiøødmädia'agøøjät. Jaduñ hajxy mhídät tu'ugmädia'agy nägøxiä. Jaduñ hajxy hoy mdsänä'awät nägøxiä. ⁹Coo mijts pøn cøxypänejpä xtiúnät, cab hajxy myaghawiimbijtägätsät. Y coo hajxy pøn xwyiinwóonät, cab hajxy mhadsoowiimbídät. Mmänuu'xtä'agäbä Dios hajxy jaduñ coo ween piuhbedyii ja'a tøø xwyiinwóonäbä. Jaduñ mijtsä Dios tøø xyajnähdijy coo Dios ja'a hoyhajtä weenhajt hajxy xmió'owät.

¹⁰Pø mdsojpiä mhoyhäyow ja'a mhoçhänä'a hajxy, cab hajxy mänaa mhøhndá'agät.

Cab hajxy mänaa mgapxtägóyyät.

¹¹Mnajtshixø'øwäbä mhaxøøgwiiinmahñdy hajxy.

Hoy hajxy mjäya'ayhädät.

Cab hajxy mnimiädsip mnimiäma'adøøjät ni mänaa.

¹²Hix, cwieendähajpiä Dios pønjatiä miädia'agy mabøjcäp.

Y coo Dios hajxy miänuu'xta'agy, mänit hajxy piuhbedyii.

Pero ja'a häna'c-hajxy haxøøg wädiypä, cab hajxy näxuuchii ja'a Diósäm,

nømä Diosmädia'agy miäna'añ.

¹³Hoorä, coo hajxy

hamuumdu'joot mhojiäya'ayhädät, cab hajxy jaduñ pøn cøxypänejpä xtiúnät. ¹⁴Jii jäya'ayhajxy näje'e, mijts xjia wi'i chaaçhtiunaamb, hoy mijts mja hojiäya'ayhaty.

Pero ca'a hajxy mdsähgø'y; ca'a hajxy tii mdajy mmay. Ja'a Dios hajxy jaduñ xcwieendähadaamb.

¹⁵Hamuumdu'jootä Jesucristo hajxy mwiingudsähgø'øwät. Hix, jaaya'ay hajxy nWiindsøn'hajtäm. Y coo hajxy pøn xmiäyajtøwät tiiguiøxpä Diosmädia'agy hajxy hänajty coo mmäbøcy, cab hajxy mdsähgø'øwät; mnägäpxäp hajxy jaduñ tiiguiøxpä hajxy coo mmäbøcy. Mee'xxieemy hajxy jaduñ mhadsówät, ca'a yhajootma'adä. ¹⁶Nägüeentä hajxy tehngajnä mwädität, coo hajxy jaduñ mnä'a cädiéeyät. Jaduñnä tøyhajt hajxy mmøødhädät coo hajxy hänajty hoy mwädity. Hoy hajxy mwädität, hoyyä jäya'ay hajxy xjia nähojy xjia näya'axy coo Jesucristo miädia'agy hajxy hoy myajtuunä. Coo hajxy jaduñ hoy mjaançh wädität, mänitä häna'c-hajxy jaduñ chähdiuna'añ coo mijts hänajty jaduñ tøø xñänømy.

¹⁷Hoy jaduñ coo hajxy hoy mwädität, hoy hajxy hänajty mja tsaachpøcy. Hix, ja'a Dios hajxy hänajty tøø xyajnähdijy coo hajxy tähoocjaty mdsaaçhpøgät, hoy hajxy hänajty mja howiädity. Pero

coo hajxy hānajtʸ haxøøg mʲatcø'øʸ, cab jaduħᵿ yhooyä; mgumädöwäp hajxy jaduħᵿ. ¹⁸Hoyyä Jesucristo mānaa quia'a jagä cädieey, tsaächpøjc je'ebä. Coo hajxy hoy xñähho'túutām, jaduħᵿnä nbojpä ngädieey hajxy xyajñähwáatsām. Y jaduħᵿ hajxy jim xyajñøcxáanām Dioswiinduum. Tähooquiä hajxy xñähho'túutām. Ja'a ñi'xä quiopc-hajtiä jaduħᵿ ho'c. Pero ja'a jiootä yhEspiritu, cab jaduħᵿ ñä'ä ho'cy; jujyñä hānajtʸ jaduħᵿ yhity. ¹⁹Ja'a jiäwøhñdyhaamä Jesucristo yhooyy maa ho'ogyjiäya'ayhajxy hānajtʸ tsumy yhitiän. Jimä hawiinjemybiä mädia'agy hajxy hoy yajwiingapxø'øʸii coogä Dios ja'a Jesucristo hānajtʸ tøø quiexy mäyajñähwaatspä. ²⁰Paady hajxy hānajtʸ tsumy yhity je'eguixpā coo Diosmädia'agy hajxy jecy quia'a mabøjcy mānaa Dios jia nägäpxiän coo nøøgomdägoy hānajtʸ tiägø'øwa'añ, mānaa Noé ja'a biarco hānajtʸ yhädiuñän. Cabä Dios mānitiä yajtägøøʸy tuubä. Jia hahijx jecy pø mabøgáanäxäbä miädia'agy hānajtʸ. Coo jaduħᵿ yhijxy coo hajxy hānajtʸ nämay quia'a mabøga'añ, mānitiäs yajtägøøñä tuubä. Mānitiä nøøgomdägoy tiägøøñä. Jagooyyä Dios yhijxy coo Noéhajxyhajtʸiä hānajtʸ miäbøga'añ, ja'a hajxy hānajtʸ näductújiäbä. Jagooyyä Noéhajxy jaduħᵿ miäbøjcy. Je'eds hajxy jaduħᵿ jiiby tsooc barcojooty, ja'a hajxy hānajtʸ tøø yhädiuñäbä. ²¹Nebiä Noéhajxy jecy chooquiän jiiby barcojooty mānaabä nøøgomdägoy jaduħᵿ tiägø'øʸyän, jaduħᵿ mäwiinäts

je'e miäbaady néjjiäm coo hajxy nnäbéjtām nøøjooty, coo Jesucristo hajxy xyajñähwáatsām mānaa jiuujyipiøjtägachän. Paady hajxy jaduħᵿ nnäbéjtām nøøjooty, hijxtahᵿnd jaduħᵿ coo hajxy nnähwáatsām. Ja'a ngorazonghajxy jaduħᵿ wáatsām, ca'a ja'a ñni'xä ngopc-hájtām. Coo hajxy jaduħᵿ nnäbéjtām, jaduħᵿnä Dios hajxy hamuumdu'joot nhawáanām coo Jesucristo miädia'agy hajxy nnä'ägädä panøcxáanām. ²²Coo Jesucristo hānajtʸ tøø jiuujyipiøjtägach, mānit jim ñøocy tsajpootyp. Jim yhäñaañä maa Dios quiø'ø hahooyyhaampiän. Je'e jaduħᵿ nänøømby coo cuhdujt jim miøødä møj jaančh. Hix, wiingudsähgøøʸyabä Jesucristo jim. Ja'a Dios mioonsähajxy, ja'a hajxy jim hijpä tsajpootyp, je'eds hajxy jaduħᵿ mäwiingudsähgøøby, møødä cuhdujtmøødpähajxy. Høxtä møjcu'ubaadyhajxy yhane'emyii ja'a Jesucristām.

4 Coo Jesucristo chaačhpøjcy, miee'xtujc ja'a tsaächpä jaduħᵿ. Jaanä jaduħᵿ mijtspä, coo Jesucristo hajxy mmøødhity tu'ugmädia'agy, paady hajxy jaduħᵿ mmee'xtújpät, coo hajxy hānajtʸ pøn xyajtsaačhpøcy. Coo hajxy jaduħᵿ mjaančh tsaächpøjöpät nebiä Jesucristo chaačhpøjquiän, jaduħᵿ hajxy myajcähxø'øgät coo mhaxøøgwiinmahñdy hajxy tøø mhøxhijxnä. ²Coo mhaxøøgwiinmahñdy hajxy jaduħᵿ mjaančh høxhixät, hoy hajxy jaduħᵿ mjäya'ayhada'añ mäduhñtiä hajxy yaa mjaac hida'añ hädaa yaabä naaxwiin. Jaduħᵿnä Dios

hajxy xquiumáyät. ³Jue'e mijts hijty, haxøøg hajxy hijty mjatcø'øy nebiä häna'c-hajxy jiatcø'øyän, ja'a Diosmädia'agy hajxy ca'a mäbøjpä. Cab jaduñ yhahixø'øy coo hajxy jaduñ mjatcø'øyät. Hanaxiä hajxy hijty haxøøg mjatcø'øy. Hanaxiä jocnøø hajxy hijty mjaanč tehñ yhu'ugy mjaanč tehñ jioø'xy coo xøødsuu hijty maa jadyii. Tsähdiuhñdägoy hajxy hijty mjatcø'øy, ya'adiøjc møødä to'oxiøjc. Jäya'ayhadsejtsnaxy hajxy hijty naxy mwiingudsähgøøby møødä jäya'ayhabojtsnaxy.

⁴Y ja'a jäya'ayä Diosmädia'agy hajxy ca'a mäbøjpä, ja'a mijts hijty naxy mmägu'ughajpiä, yagjuøøby hajxy jaduñ coo mijtsä mhaxøøgwiinmahñdy mga'a yaghanajxnä neby hajxy hijty myaghanaxiän. Paadiä mmägu'ughajpä hajxy jäda'ahaty xñähojnä. ⁵Pero coo Dios jaduñ yajñähñjät coo hänajty tøø yhabaatnä, mänit hajxy hänajty tiøyhajtyega'añ maa Dioswiinduumän. Mänitä hajxy yajcumädowa'añii ja'a Diösäm, hoy hajxy hänajty jia juyquii, hoy hajxy hänajty tøø jia ho'ogy.

⁶Hix, jaduñä Dios jioot chocy coo ho'ogyjäya'ayä miädia'agy hajxy ween miäbøjcäxä, paadiä Dios ja'a yHuung Jesucristo jim quiejxy maa ho'ogyjäya'ayhajxy hänajty tsumy yhitiän. Jimä Jesucristo ja'a Diosmädia'agy hoy yajñähixø'øy coogä Jesucristo miäyajñähwa'ačh. Jaduhñägä ho'ogyjäya'ayä jäwøhñdyhajxy homiänaajä jjugyhädät nebiä Dios jjugyhatiän,

hoyyä ñi'xä quiopc-hajxy hänajty tøø jia ho'ogy.

⁷Habáatnöp jaduñ coo naaxwiimbä wyiimbidaannä. Paady hajxy tehngajnä mniyajcopcø'øwøøjät nebiä mjoot hajxy yaa mga'a pädá'agät maa hädaa yaabä naaxwiimbän. Jaduhñä Dios hajxy hoy mba'yá'axät hamuumdu'joot. ⁸Je'e jaduñ nä'ägä tsoobaatp coo hajxy hamiñ haxøpy mničhoc mnimiee'xøøjät. Hix, coo hajxy hamiñ haxøpy mničhöjcämät, mänit hajxy hoy nnimiämée'xämät. Jaduhñ hajxy hoy ndsänäayyämät.

⁹Coo pøn jim quiuyo'oy quiunaxø'øwät maa mjøøn maa ndøjc-hajxiän, hamuumdu'joot hajxy myajtøjtägø'øwät. Myajcay myaghú'ugäp hajxy jaduñ hahoy haween. ¹⁰Cøjwiinduumä Dios wiinmahñdy hajxy xmiöoyäm coo tuung hajxy wiingjaty nmøødhájtäm. Jaduhñä jäya'ayhajxy nägøxiä piuhbedøøjät, ja'a hajxy hänajty tøø miäbøquiäbä ja'a Jesucristocøxpä. Jaduhñ hajxy mnibihuhbedøøjät nebiätä Dios tuung hajxy cøjwiinduum tøø xmiö'oyän. ¹¹Pønjaty tøø tiuungmo'oyii coo Diosmädia'agy hajxy yajwá'xät, hoy hajxy quiapx miädiá'agät nebiä Dios quiapxy miädiá'aguiän. Pønjaty tøø tiuungmo'oyii coo hajxy miäbuhbédät, ween hajxy jaduñ hamuumdu'joot miäbuhbety. Ja'a Dios jaduñ puhbédäp. Coö hajxy hänajty tijaty mduna'añ, hoy hajxy mdúnät; jaduñä jäya'ayhajxy miäbøgät coo Dios miøjjä jiaančhä. Wyiingudsähgø'øwaambiä

Dios hajxy jaduñ je'eguiõxpä coo Jesucristo hajxy hoy xyajñähwäätsäm. Cõjxta'axiõø ja'la Dios wyiingudsähgø'owa'añii. Cõjxta'axiõø mõjcuñdujt miõõdhada'añ. Amén.

¹²Mägu'ughajpädõjc, cab hajxy myagjuõ'owät coo tsaächpä hajxy naxy xpiaady mõc-haampiä. Hiõ, tsipcõxpä tsaächpä hajxy xñä'ägä paada'añ. ¹³Jaduñ quiähxø'õgät pø hamuumdu'jootä Diosmädia'agy hajxy mjaançh mäbøcy ja'la Jesucristocõxpä, pø caj. Hiõ, maas hanaxiä Jesucristo chaaçhpõjcy mänaa hajxy hoy xñähho'túutäm. Hiõ, coo Jesucristo hajxy jaduñ mmøõdhity tu'ugmädia'agy, paady hajxy jaduñ tsipcõxp mbadsaaçhpõjpat. Y coo Jesucristo hänajty yaa quiädaactägatsa'añ hädaa yaabä naaxwiin, mäñit hajxy hänajty mjaançh tehñ xioõnda'aga'añ. Paady hajxy jäda'ahaty mxoõndáacnät, hoyyá tsaächpä hajxy jaduñ xjia paady. Pero cabä tsaächpä hajxy jaduñ myagjuõ'owät. ¹⁴Coo hajxy pøn xñähõjät ja'la Jesucristocõxpä, cab hajxy myagjuõ'owät. Pero mxoõndá'agäp hajxy jaduñ. Hiõ, jaduñä Dios ja'la yhEspírituhaam hajxy xpiuhbédät mõødä wyiinmahñdyhaam. Coo mijtsä jäya'ay xyhíxät coo hajxy mmee'xtucy coo hajxy hänajty mdsaaçhpøcy, mäñitä Dios hajxy wyiingudsähgø'owa'añ. ¹⁵Hahixøøby jaduñ coo hajxy mdsaaçhpõgät, pø tøø hajxy hänajty mmäjäya'ay-yagho'ogy, pø tøø hajxy hänajty mmämeeçh, pø tøø hajxy hänajty myajtägø'øyy maa cueendä

hajxy hänajty mga'a mõødän. Cab jaduñ yhooyä coo hajxy jaduñ mjatcø'owät. ¹⁶Pero je'e mäbøcypäiä caj chähdiuhñdmøødä coo hajxy mdsaaçhpõgät je'eguiõxpä coo Jesucristo hajxy hänajty mwiingudsähgø'øyy. Jootcujc hajxy jaduñ mhídät. Mnämä'awäbä Dios hajxy “Dioscujú'uyäp” ja'la Jesucristocõxpä.

¹⁷Tøø yhabaatnä coo Dios hajxy xyajtøyhajtyegáanäm. Coo Diosmädia'agy hajxy nmäbõjcäm, paady hajxy jayõjp xyajtøyhajtyegáanäm, paady hajxy jayõjp xyajtsaaçhpõjcäm. Pero ja'la häna'cä Diosmädia'agy hajxy ca'a mäbõjpä, coo hajxy hänajty tiøyhajtyega'añ, maas hanaxiä hajxy hänajty chaaçhpøga'añ. ¹⁸Siémprämä hojiäya'ayhajxy chaaçhpøga'añ. Maas hanaxiä ca'awiindøyhána'c-hajxy chaaçhpøga'añ, ja'la Dios hajxy ca'a wiingudsähgøøbiä. ¹⁹Coo hajxy hänajty pøn xyajtsaaçhpøcy nä'ä nägoobä, cab hajxy mmõjpadá'agät. Tehñgajnä hajxy hoy mjaac jäya'ayhádät. Hiõ, ja'la Dios hajxy hänajty tøø xyajmädsocy coo hajxy mdsaaçhpõgät.

5 Mijts majjäya'adiõjc-hajxy, ja'la hajxy jim tuumbä tsajtøgooty, mijts cham nmägapx nhane'emaamby. Nmøõdhøçhä cuñdujt jaduñ cooçh mijts jaduñ nmägapx nhané'emät, je'eguiõxpä cooçh tøø nmäjaabä, mõød cooçh jim nduumbä tsajtøgooty. Nhijxhó'c-høçhä Jesucristo jim cruzcõxp. Y coo Jesucristo yaa quiädaactägätsät hädaa yaabä naaxwiin, näguipxy hajxy hänajty

jim xyajnöcxáanäm tsajpootyp,
 hөөч mөөд mijts. Jimä hoyhajtä
 weenhajt hajxy xmio'owáanäm
 pedyii. ²Mijts majjäya'adiöjc,
 hoyyä Diosmädia'agy hajxy
 myajnähihö'owät hamuumdu'joot,
 ca'a yhadsip ca'a yhajootma'adä.
 Hamuumdu'jootä cu'ug hajxy
 mmägäp mhané'emät. Hix,
 ja'a Dios hajxy tөө xpiäda'agy
 coo cu'ug hajxy jaduhñ
 myajnähihö'owät, mөөд coo
 hajxy mmägäp mhané'emät.
 Cab hajxy xädö'öñguiöxpä
 myajnähihö'owät. ³Cab hajxy mөc
 mөc mhané'emät. Mee'xxieemy
 hajxy myajnähihö'owät. Hoyyä
 Diosmädia'agy hajxy myajtúnät;
 jaduhñä cu'ug hajxy xpiahix
 xpiadúnät. ⁴Y coo Jesucristo
 yaa quiädaactägätsät, ja'a hajxy
 nWiindsöñhajtämbä, mänit
 hajxy xquiumaya'añ pө tөө hajxy
 hänajty hoy myajnähihö'öy. Mänit
 hajxy hänajty jim xyajnöcxä'añ
 tsajpootyp. Cөjxta'axiөө hajxy
 hänajty jim mhida'añ.

⁵Mөөд mijts muutsc-häna'c,
 jaduhñ mijtspä,
 mwiingudsähgö'owäbä
 majjäya'ay hajxy. Coö hajxy
 waamb xmiägäp xyhané'emät,
 mgudiúnäp hajxy jaduhñ. Hahoy
 haween hajxy mnibiuhbedöjät
 hamiñ haxөpy, hoy miöjjä hoy
 miutscä. Hix, coö hajxy jootmөj
 mnibiäda'agöjät, xyajcumädöwäbä
 Dios hajxy jaduhñ. Pөnjaty capxp
 mädiaacp mee'xxieemy, je'edsä
 Dios piuhbejpy. Móoyyabä
 hoyhajtä weenhajt hajxy jaduhñ.
⁶Coö Dios hajxy jaduhñ mänaa
 xyajtsaächpögät, cab hajxy

mmөjpädä'agät. Jim hajxy
 mnibiäda'agöjät maa Dios
 quiö'öba'c tiecypia'cän. Mөcmäjaa
 Dios jiaanč tehñ miөөд. Hix,
 cujequiä Dios ja'a tsaächpä hajxy
 xyajnähwä'adsät. Mänit hajxy
 jootcuje xjiaanč tehñ yaghida'añ.
⁷Coö hajxy hänajty tii mnädajy
 mnämay, mmänuu'xtä'agäbä Dios
 hajxy jaduhñ coö hajxy ween
 xyaghoyөөyyä. Hix, homiänaajä
 Dios hajxy xcwieendähäty.

⁸Mniyajcopcө'owöjöp hajxy;
 jaduhñä Jesucristo miädia'agy
 hajxy hoy mbanöcxät tehñgajnä.
 Jaduhñä möjcu'ugongä
 wyiinmahñdy quia'a mäjädä'agät.
 Hix, ja'a möjcu'ugong, homiänaajä
 hajxy jaduhñ xmiädsiphajtäm.
 Xjia wi'i yajtu'udägoyyáanäm hajxy
 jaduhñ. ⁹Cabä möjcu'ugongä
 miädia'agy hajxy mmäböjcat.
 Hamuumdu'jootä Diosmädia'agy
 hajxy myajtúnät tehñgajnä. Hix,
 pөnjatiä Diosmädia'agy mäböjp
 wiinduhmyhagajpt, jaduhñ
 hajxy chaächpөjpä nej mijts
 mdsaaächpөquiän. ¹⁰Cab hajxy
 jejcy mdsaaächpөгä'añ. Coö Dios
 ja'a tsaächpä hajxy hänajty tөө
 xyajnähwa'ačh, mänitä Dios hajxy
 hamuumdu'joot xyajmäbögaanä
 ja'a Jesucristo miädia'agy. Ca'xy
 pedyii Dios ja'a wyiinmahñdy hajxy
 xyajnähihö'öwa'añ. Ja'a Diösäts
 hajxy jaduhñ xcwieendähajtäm,
 hoy hajxy nej cu nja jajt cu nja
 habéjtäm. Tiuumbiä Dios mayhajt
 jaduhñ maa höjtscөxphajtäm.
 Jaaya'ay hajxy jaduhñ tөө
 xyajnähdíjjäm coö Jesucristo hajxy
 jim xyajnöcxáanäm tsajpootyp.
 Cөjxta'axiөө hajxy jim nhidáanäm.

Hix, cøxiä Dios ja'a hoyhajtä weenhajt hajxy jaduhñ xmióoyäm.

¹¹Cøjxta'axiøø ja'a Dios hajxy tsøc wiingudsähgøøyyäm. Cøjxta'axiøø ja'a Dios mõjcuहुdujt miøødhada'añ. Tøyhajt jaduhñ.

¹²Ja'a mägu'ughajpä Silvano hädaa nocy jahby. Høøch nnajtsapxøøyyäp. Cab hädaa nocy jiaty yoñä. Hoyyä Silvano Diosmädia'agy jiaanč tehñ yajtuñ. Tøyhájthøch cham tøø ngapxy tøø nmädia'agy nebiä Dios tøyhajt wyiinmayyän. Tøø Dios mõjmayhajt tiuñ maa højtsøxphájtäm. Tøø hajxy jaduhñ xyajmädsójcäm coo hajxy jim xmiøødhájtämät tsajpootyp.

¹³Ja'a jäya'ayhajxy yaa tsánaabiä Babilonia, ja'a

Diosmädia'agy hajxy mäbøjpä ja'a Jesucristocøxpä, xyajpoo'xp mijts jaduhñ. Nej mijtsä Dios xyajnähdiijiän coo miädia'agy hajxy mmäbøjcät, jaanä jaduhñä jäya'ayhajxy yaabä yajnähdiijjäbä coo hajxy miäbøjpät. Jaduhñ mijtsä mmägu'ughajpä Marcos xyajpoo'xpä. Nébiøchä nhamdsoo húungänä Marcos njuø'øy. ¹⁴Coo hajxy hánajty mhamugø'øy Dioswiingudsähgøøbiä, hamiñ haxøpy hajxy mniyajpoo'xøøját. Jaduhñ hajxy myajcähxø'øgät coo hajxy tøyhajt mničocy mnibia'häyoyii hamuumdu'joot.

Pønjatiä Diosmädia'agy panøcxp ja'a Jesucristocøxpä, weenä hoyhajtä weenhajt hajxy mio'oyii ja'a Diósäm. Amén.